

24/10/1998

Kekayaan diagih adil

ORANG ramai lega dengan jaminan Datuk Seri Dr Mahathir Mohamed ketika membentangkan Belanjawan 1999 untuk terus membela dan memberi perhatian kepada golongan berpendapatan rendah.

Langkah itu selaras dasar kerajaan untuk mengagihkan kekayaan negara secara adil kepada semua kaum walaupun ketika negara dilanda kegawatan ekonomi.

Pendekatan Perdana Menteri yang juga Menteri Kewangan Pertama menghapuskan cukai eksais barangan elektrik serta menaikkan duti import rokok dan tembakau dianggap dasar yang memberi kebaikan kepada pengguna.

Eksekutif Akaun Celcom, Raja Azlan Shah, 29, berkata keseluruhan Belanjawan tahun depan memberi manfaat besar kepada golongan berpendapatan rendah berikutan penurunan dan pengecualian beberapa jenis cukai.

Dia turut tertarik dengan langkah memberi cuti sehari pada satu Sabtu setiap bulan dan menyarankan sektor swasta menyusul langkah itu.

"Bekerja separuh hari pada Sabtu kurang memberi peluang untuk bersama keluarga dan kemungkinan dengan langkah kerajaan itu, lebih banyak sektor swasta mengikutinya," katanya.

Penyelia kedai elektrik, Ken Loh Kin Keong, 26, berpendapat penghapusan duti eksais barangan elektrik dapat menarik lebih ramai pelanggan.

"Perniagaan barangan elektrik terjejas teruk dengan jumlah pelanggan kurang 50 peratus sejak kegawatan.

"Menerusi langkah itu, lebih ramai pelanggan berminat membeli barangan elektrik," katanya.

Penyelia kedai, Ah Kui, 28, turut menyokong langkah itu dan berharap duti eksais berangan lain juga dihapuskan bagi menarik lebih ramai pelanggan dan merangsang semula perniagaan barangan elektrik.

Juruaudit Tarmizi Azhar & Co, Norliza Zainuddin, 27, berkata pengecualian cukai pendapatan pada 1999 adalah langkah paling wajar kerana ia membantu orang ramai yang terbeban dengan kenaikan barangan terutama keperluan asas sejak kegawatan ekonomi.

"Belanjawan tahun depan memang tidak membebankan malah lebih baik daripada tahun lalu kerana mengambil kira kepentingan pengguna terutama suri rumah," katanya.

Kerani syarikat swasta, Fajar Hussin, 42, menyambut baik langkah menaikkan cukai tembakau sekali gus harga rokok walaupun ia akan menjejaskan kos pengeluaran sektor terbabit.

"Saya berharap caruman majikan dalam Kumpulan Wang Simpanan Pekerja dinaikkan kerana ia menguntungkan golongan berpendapatan rendah pada sebagai jaminan masa depan," kata.

Ismail Hamzah, 22, berpendapat kerajaan perlu mengambil langkah memastikan kalangan korporat dan hartawan turut melaksanakan tanggungjawab sosial dengan membantu golongan miskin.

"Rakyat berpendapatan rendah perlu dibantu untuk membolehkan mereka mengecapi nikmat pembangunan negara secara lebih seimbang," katanya.

(END)